

重校
箋註

錢牧齋全集

初學集卷六十五

牧齋全集第一種

虞山 錢謙益 牧齋 撰

神道碑四

資政大夫兵部尚書贈太子少保申公神道碑銘

國家休明昌大之運自世廟以迄神廟比及百年可謂極盛矣公卿大夫際昇平而樹鴻駿者不可勝數其在我吳則申文定公父子爲最著登於世廟之朝迨神廟而大拜者文定公也仕於神廟之朝迨今上而大用者司馬公也先後六朝父子一德譬之作室塋茨資於後昆譬之種樹梓漆食於易世祖宗養士之効豈不大哉司馬之歿也其子騰芳濟芳請於朝詔贈太子少保給祭葬錄一子入冑監崇禎十三年十月大葬於靈巖鄉之新阡俾謙益書其隧道之碑謹按故資政大夫兵部尚書申公諱用懋字敬中特進光祿大夫左柱國少師兼太子太師吏部尚書中極殿大學士贈太師諡文定申公第二子也母封一

品夫人吳氏公爲諸生文定在館閣折節讀書如後門寒素文定賢而愛之閒嘗蒐討掌故講求邊務以佐文定於政地不獨囊篋細碎有助於晨昏也萬曆癸未舉進士除刑部主事明習法比吏無以欺改兵部車駕司主事陞武庫司員外逾年移疾請告文定公亦致政歸里補職方司員外陞武選司郎中公在車駕覈馬政清郵符提約明故具有條理在武庫關給布花剋期省牒內庫不稽營軍叫讙在武選勾稽襲替按考冒濫部居課第咸著牘聿潔廉以奉公勤敏以成務諳練部故曉暢物情大司馬有所舉厝必問申郎中云何嚴重於諸曹矣神廟留心疆事遼東總兵久缺奪職方郎中以下官咸謂非公不能副上指遂以武選調職方司郎中公謂遼左惟李氏世將知虜虛實所畜夷漢丁能捍虜死戰李氏守遼實自守其家以李氏委遼以遼委李氏而後遼可保也即家起故寧遠伯成梁及其子如松上大喜乃釋然無東顧憂武弁陞除壹以督撫薦剡爲準薦不及格者不輕用用必人與地相宜于是名將杜松董一元兄

弟麻貴麻承恩張承胤並建旗鼓邊徼改觀屬國之役兵久戍不解公謂鮮人仰兵食於我而我遙給鮮人以自困非策也請勅督撫酌議進止諭鮮人不得專倚中國坐觀成敗公題覆東征事宜多矣其老成持重動中肯綮皆此類也久之告歸侍文定於里門三年始赴闕一時謂職方卒無以逾公邊鎮奏捷屢荷叙賚壬寅以寧夏捷功加五品京堂銜管事神廟召至隆宗門問襖兒都司奴兒干都司扯力艮部落三事公條對精詳若出笏記神廟傳旨歎嘉郎中九年考滿疏上不下癸卯上手詔陞太僕寺少卿仍管職方事明年冬始奉旨回寺先後歷兵部諸曹十九年守職方八年餘荷上知遇益侃侃自發舒稅監楊榮通阿瓦緬夷開道蠻莫遼監高淮私置兵都城外請復鎮守皆抗疏糾劾兵部叙安南繼襲功請支問寺馬價公謂夷方繼襲本非血戰軍功欽州內訌卽是交南流賊渠魁未獲醲賞謂何疏罷其賞舉朝以爲知體念文定老疏請侍養家居六年奉文定諱又八年烹廟御極以原官起用三年陞南京太常寺卿

是時遼左淪喪畿輔震驚公上言建四輔以鞏神京京東南建城於通州高米店之閒爲左輔西南建城於良鄉蘆溝橋之閒爲右輔西北建城於鞏華城功德寺之閒爲右輔東北建城於密雲順義之閒爲左輔各宿重兵統以元戎監以知兵使者虜繇東北入左輔出兵以扼其衝而右輔從左左輔從右各分兵夾擊如假道三衛右輔出兵以扼其後而左輔從左右輔從右各分兵追襲如直薄都城下則京營堅壁合守無輕出擊四輔各設長圍以坐困之又補三面外羅城設民堡練鄉兵令郡邑正官參預武備疏上不報南太常入賀上恢復遼疆疏主高陽樞輔三方聯絡之策而以奇正因敵漸規進取亦下部議覆乙丑陞都察院右副都御史巡撫順天公至鎮訪問故戚大將軍繼光建置遺跡單車東巡周行三千餘里亭障幾何墩軍幾何藺石渠答幾何口疏手指歷歷如甲乙險要阨塞窮歷老將退卒所不至者方病足不良於行兩健兒掖而登沙石盤牙衣履鈎裂喘息支綴不但已也事竣上東巡八事上優詔寵答焉鎮

軍十六萬闕餉至八十餘萬拊循慰諭宣布恩德迄公任無敢譁者今上初起
兵部左侍郎三品考滿加右都御史新城王公總督宣大請欵挿以制奴公力
主其議王公病免三十六家束不的未受欵王公薦公自代不果公歎曰禍未
艾也上薊昌修攘大計疏釐爲八事進九邊圖說以續許襄毅之後蒿目邊事
如不終日已巳六月束曾果以議婚爲名導奴大入十一月奴犯薊東上震怒
下本兵於獄命公署部事越四日詔公爲兵部尙書即日抵任而奴已薄城下
九門晝閉人情兇懼執政莫敢言公從容爲上言請弛一日禁以通煤米中外
始安督師之繫也部帥祖大壽鷗恐颺去上手詔樞輔追止之公據案草檄大
壽感泣旋師越數日援兵大集公分撥信地隸各大帥分兵爲六營以南面外
羅城永安左安右安三門爲中營滿桂主之隸以宣大兵萬餘廣寧東便兩門
爲左翼祖大壽主之隸以遼兵九千廣渠西便兩門爲右翼馬世龍主之隸以
京營兵八千東則朝陽東直兩門爲東營黑雲龍主之隸以關寧兵二千西則

阜城西直兩門爲西營孫祖壽主之隸以密雲兵三千聯絡布置壁壘一心自是京師可固守矣滿桂者嘯喈宿將受命總理急欲一創奴不奉師期與奴戰敗沒公引罪自劾上溫旨慰留奴自是遂拔營去明年正月奉旨解任奴在城下五十餘日上數御便殿賜茶菓召問退虜方略辨色而入乙夜而出傳宣接道軍書刺閨覆奏批答取辦漏刻裳衣枕藉食飲錯互稍閒則周行城陴俯察營壘履聲犖犖然與僵徒塚卒更相踟躕解嚴浹月始還邸舍上知其忠而閔其勞公雖去每叙資未嘗不及公公忠勤謀國未嘗詭詞激諫如良醫之診治鑿鑿皆有左證天啓初建四輔之議人以爲迂已而奴披薊北輶畿南狼突豕竄無一尉一埃能少寔其角距者此公之言驗於事後者也高文襄在隆慶中有請儲邊才之議公援以入告留中四年矣上取文襄原疏進覽立見施行此公之言行於去後者也公嘗憂漕運梗咽撫採丘文莊衍義及元人朱張故跡議復海運聞者噤莫敢應今歲上遂採吳人議舉行此公之言行於身後者也

公爲人易直溫厚周詳曲密言笑煦煦然憂主辱念國愾眉折肱如恐不及病且革嘔呻歎噫以奴寇未滅爲慮語不及私神廟時儲位未安文定從容調護誼不得如疎賤小臣囂呼歎鳴激聒上怒言者不察譌爲將順流傳膏飾久而滋甚公先後拜疏伸雪瀝血膏剖腎腑四易世而始白昔人有言此陛下家事東朝之事神廟與今上親爲證明豈可動哉使文定羽翼苦心不致抑沒而因以發皇兩朝慈孝光於國史其爲忠孝也大矣家居三十年平繇役賑凶饑急病讓夷吳人倚爲司命歲時伏臘問遺親知故舊雖惇嫠老孤馬醫洗創無不逮及歿之日質劑書契填塞篋衍行道皆爲歎泣公之存也人知其好施不知其貧其歿也人知其貧不知其好施而貧也此於公爲細事亦可以觀公矣公蘇州吳縣人曾大父諱某大父諱某皆以文定公貴贈如其官配贈淑人欽氏繼室封安人楊氏封淑人顧氏子男六人承芳授試中書舍人聯壁庠生皆早卒傳芳蔭尙寶丞以哭公卒騰芳授中書舍人薦芳濟芳皆蔭國子生崇禎

十一年十月十八日卒於里第享年七十九謙益件右公行事喟然歎曰人言古今人不相及殆古今不相及耳天下士何可盡誣也本朝稱名本兵者遠則劉忠宣近則王襄毅忠宣起孤生受孝廟特達之知獨力行一意無所閒染公以貴游子弟困黨論之謠詆睨胸交集顧視滋多視忠宣難也襄毅肩貢市當新鄭專斷之日拱手受成議無所鯁避公以孤危寡援值政地之闕茸方圓互畫枘鑿相入視襄毅難也以兩己巳之役比而論之內無團營之兵外無亨彪之將資捍禦於禁近寄廟社於堵墻使于忠肅當之猶將斂手却步賴主上神靈羯奴奔迸身名顯融豈非尤難之難者哉語有之爲臣不易繇異代視公必有爲之累歎而太息者系之銘曰

文定作相我祖惟神惟文定有子惟我有臣公之知兵厥有家譜服官樞曹早歲籌虜幽薊偪處雜種羯胡禁門條對聚米畫圖帝曰汝懋乃父是似我其試哉以詒孫子蠢爾奴酋薄我神京突如焚如勢如建瓴帝庸震驚爰命圻父張

皇六師齊以鉞斧分兵六營設守八面厲兵秣馬戒以不戰奴知有備潛師夜逃帝曰念哉惟汝之勞公拜稽首天子萬年角巾東還白首歸全議卹祠官謚太常復土之祭天語煌煌高墳石闕邦人拜之惟忠惟孝神祖是思生榮死哀是父是子刻詩墓門以詔無止

南京刑部尙書沈公神道碑銘

公諱演字叔敷湖之歸安人也以鄉進士諱熾者爲曾祖以封南京尙寶司卿諱塾者爲祖而工部左侍郎贈都察院右都御史謚端靖諱節甫者之子也端靖後以其子文定公謚淮之貴追贈三世至光祿大夫柱國少保兼太子太保戶部尙書武英殿大學士公文定之弟也而於端靖爲叔子與文定鄉會試皆同舉文定選入翰苑而公自引居留曹其歷官也於南歷工兵二部於北歷工禮二部以端靖家居移病省侍十餘年服除出爲叅議於福建於江西爲副使於山西轉布政於福建爲右於陝西爲左入爲順天府尹刑部侍郎天啓中削

籍今上起侍郎工部陞南京刑部尙書予告歸年七十三以崇禎十一年十一月卒於里第葬於某地之某阡天子賜祭葬如甲令以慰寵其家公有子樺殤以伯兄之次子槩爲後於是槩之兄中丞公槩以公之胄出位序行治爲書請余銘其墓隧之碑余讀而歎曰士君子之用於斯世也有得其位行其志而爲其所欲爲者矣亦有得其位行其志而不得爲其所欲爲者國家之事任與其人不相值而其人遂不得極其設修以赴國家之急是可歎也公在郎署都水董織造以庀婚禮主客謹繚索以御貢夷耆事數典知國大體敷歷外服兵荒旁午催徵繹騷江右之改折閩之加額秦之藩工藩祿勾稽羨溢櫛爬伏匿括額外銀鉅萬以抵正額而儲待以備非常復數萬雖有大役不病加派川餉初解京後給陝積逋四十餘萬請仍以京運給陝川餉給川京邊各還其額而川餉不得逋其縫紉調齊融通濟變皆此類也閩海市場移於呂宋不近北港洋舡未泊嚴檄巡徼而通倭接濟者絕矣謂許瑞善用林容湯克寬不善用曾一

本後事之師也收其魁桀使勦捕自效貪賞構怨勢不返顧海寇新附閩將沈有容移登萊議令簡其桀黠者以北登得其用而閩安布政司火燬金於煨燼還庫金三十餘萬而籍其羨以新堂庫厥後殿工浩煩敲剝日急公請暫借閩庫三分之一以紓民困逆奄藉口於公盡數起解未久而公以忤奄去人乃知空閩庫以進奉非公本指也南刑部請曹郎濫受詞訟符牒四出叫囂隳突雞狗不得寧公受事一切禁絕都民炷香祝誦歡呼更生讀律精詳筮仕時手自箋注諸所平反覆案老獄吏捧手瞻視每有執奏申律意叅條例上未嘗不稱允也公歷官四十年諳曉典故周知土俗披文相質輔衡而行所至治理所謂得其位行其志而爲所欲爲者也然而國家之患莫大乎東奴西寇而公之所深憂而熟計者亦在於此在客部奴兒干部貢夷工孛羅怙衆騷然公給衆賞革三人賞以申罰迄不敢譁遺書執政謂奴已并南關當陰求其部落合北關以剪之母使蔓而難圖也越十三年而有撫順之事遼事之殷也公多所建置

請以遼民復遼土以遼土贍遼民興復屯鹽盡天下力以強遼卽用遼以蘇天下堅左右輔以固神京屯臨清上下以護運建民堡以衛近畿通海運以佐屯牧其後昌灤固守遵永復宇而山東以無備被躡公之言無一不左驗其策流寇也以爲不在調兵而在集民不在窮其往而在遏其來勦以經略不若督撫勦以督撫不若郡縣勦以郡縣不若團結鄉鎮人自爲守又謂江南地勢不足制中原扼要惟江北孫曹梁魏所爭皆在合肥徐邳宜設撫鎮宿重兵以開屯護漕倣曹操之開芍陂孫權之立濡須塢以足餉倣謝玄之堰呂梁樹柵立七埭以護運屯田旣開流人土著如水得堤其流自止今安慶設撫亦用公議也公歷官錢穀刑名拮据職守不得東捍奴西盪寇奴比年長驅寇蔓延殘破楚豫而公則已老矣此所謂得其位行其志不得爲其所欲爲者耶公里居畫江南守禦事尤詳謂江南之守在鄉鎮不在城在水戰不在陸戰采石蕪湖爲陵京門戶四安東壩爲江潮咽喉福山爲通泰路徑按圖畫形諄復告戒汲汲乎

若家戶之鍵鑰也闢館舍庀薪水招延四方奇士飲飛蹴張舞劍刺擊風角測
占一長一技靡不望走其門網羅延攬冀得一二人以效一臂於國家見謾而
不怒數亡而不悔窮老而不倦觀公之晚年則其所欲爲而未得者其可知也
嗚呼士大夫當壯盛之時策高足騁長馭奔赴功名之會迨其老也崦嵫景促
鐘漏智短其不消縮而頽廢者亦鮮矣若公者何其壯也子囊遺言城郢宗澤
長呼過河公之憤盈竭蹶死而後已其用心亦何以異然則世之公卿將相以
朝廷爲傳遽玩日而視蔭者獨何心歟公謂吳中積貯盡在城外宜築外城以
爲備量工度址願斥數萬金以代經始而人莫之應也四安之復城也公實始
事以潰于成皆不可以不書銘曰

蔚矣沈氏再世其昌父子兄弟有公有卿溫溫端靖暨暨文定公居其閒金春
玉應縱橫智刃富有腹笥卷如囊括出則川委俯給軍興仰佐縣官均踰鉅萬
轉幹毫端麗水舊金陸渾新火裨竈或信祝融相我旬宣滋久乃徙京尹鳩功

方儻邦禁克允引年息馬致事懸車營此菟裘樂彼桑榆公曰吁哉我心荼苦
奴寇未滅敢恤死所魂魄離散憂心忡忡歿而猶視鬼神所恫刻詩墓門載以
龜趾豈曰激贊以告臣子

都察院右副都御史巡撫雲南錢公神道碑銘

錢公之葬也閣學遂安方公誌其窆詹端曲沃李公表其墓祭酒山陰倪公狀
其行三公之文銜華佩實固已勒諸琬琰流爲丹青矣公之二子梅棻相與謀
曰隧道之碑宜有刻也有虞山之宗老在跣而來請謙益謹据三公之文撫其
族出歷官行治而序之曰公諱士晉字康侯出吳越武肅王之後元至正閒嘉
興侯國馮徙家嘉善嘉興侯後世爲汝寧府同知諱貞貞生吾仁吾仁生繼科
娶陸氏生二子長爲東閣大學士士升次即公也祖考皆以公贈中大夫山東
右叅政妣皆淑人再以閣學贈通議大夫南京禮部右侍郎惟錢氏遠有代序
公侯復始汝寧方州著績譬岷山之濫觴祖考逢掖劬躬若昆岡之韞璧條葉

發祥伯仲競爽公與閣學鼓吹文筆則埴篲叶奏鏃礪名行則韋絃交傲雲閒
蔚其聲華沛國稱其友愛矣萬歷癸丑舉進士釋褐授刑部主事儲宮以挺擊
震驚朝右以風癩鬻獄深心抉擿破晉優枯菀之謀昌言柱檣折趙虜桐木之
禍戚畹屏息宵小怵心刑曹之爰書誣州犁爲上下工垣之抗疏疑馬融之飛
章大計射螫懂而獲免鈎黨牽連從此始矣出守大名繼督津餉絕權相之間
遺裁逆奄之支附如山如岳不吐不茹乃有緹騎監奴蒼頭養子擅開府署橫
行屠僇公禽其爪牙落其角距案徐宣之家屬棄市東海捕侯覽之賓客陳尸
濟陰於是閹媼並憎宮府交搆李膺之錄牒無不逮捕張儉之考辭多所連引
遂與趙忠毅諸公除名禁錮嗟乎震之來競國有大東小東之論夷之初旦朝
皆我公我母之徒聖人御極宇宙昭融三案燔燒四凶馘截不有君子其何能
國公等之謂歟公內仁外義崇智卑禮廉辨持已博大御物腹笥富有則春華
秋實並器而弄藏意匠經綸則箕風畢雨並時而發作其守大名也遼瀋初陷

畿輔繹騷括贖緩以抵加派閱車馬以給軍興簡六郡之良家募三河之年少
搏力勾卒擐甲裹糧此則魯公之所以守平原也其擢副使督餉天津也河西
再陷饋運梗塞覈關寧之萬旅量時日爲三運道通子午之谷師無庚癸之呼
近饋渝關遠輸島帥此則虞詡之所以通下辯也今上初以山東右布政使督
漕也句會敏給號令精明單舸徧歷於江淮飛書絡繹於齊楚債弁悍卒肅如
負霜暴漲湍流夷爲平陸五月而萬艘雲集八月而千倉露積此則韓滉之所
以輸東渭也三運告竣當宁歎嘉擢都察院右都御史巡撫雲南公以爲六詔
天末夷漢雜居蜀道旋通滇寇未懋李德裕之扼西山先城柔遠韋城武之制
南道必復石門建師宗暨板橋十城控引爨僰通霑益至永寧十站襟帶蠶叢
興鼓鑄以制錢貝疏海道以洩滇洱多積穀以倚軍實建營壘以束軍伍罷貢
金以蘇困踣築夷館以防閒諜普孽怙力囊橐岑儂公於是朝發兵符暮衝蠻
峒雷轟電掣東蠻斷瀘水以乞盟陶曾挾詐扇動交廣公於是百道長圍一面